

47. gr.

Kinda sem fara fullgildar girðingar, að dómi úttektarmanna, skulu eigendur gæta svo og stórgripa sem brjóta hlið og girðingar.

Geri þeir það ekki má bæjarstjórn taka ágangspening og selja fyrir kostnaði og usla-gjöldum.

XIII. KAFLI

Refisákvæði og gildistaka.

48. gr.

Brot gegn samþykkt þessari varða viðurlögum samkvæmt lögum um afréttamálefni, fjallskil o.fl. nr. 6/1986. Með mál út af brotum skal farið að hætti opinberra mála.

Samþykkt þessi sem bæjarstjórn Hornafjarðar hefur fjallað um og afgreitt, staðfestist hér með, samkvæmt lögum um afréttamálefni, fjallskil o.fl. nr. 6/1986, til að öðlast þegar gildi og birtist til eftirbreytni öllum þeim sem hlut eiga að máli. Jafnframt er úr gildi felld fjallskilasamþykkt fyrir Austur-Skaftafellssýslu, nr. 484, 30. ágúst 1996.

Ákvæði til bráðabirgða.

Fyrir 1. september 2000 skal bæjarstjórn Hornafjarðar endurskoða fjallskilasamþykkt þessa. Við þá endurskoðun skal í 25. gr. samþykktarinnar tilgreina a.m.k. eina aðalrétt í hverri fjallskiladeild innan sveitarfélagsins.

Landbúnaðarráðuneytinu, 3. september 1999.

F. h. r.

Guðmundur Sigþórsson.

Ingibjörg Ólöf Vilhjálmsdóttir.

REGLUR

um öryggisleiðbeiningar vegna efnanotkunar á vinnustöðum.

1. gr.

Gildissvið.

Reglur þessar gilda um varasöm efni og vörutegundir sem nota á við atvinnurekstur sem fellur undir lög nr. 46/1980 um aðbúnað, hollustuhætti og öryggi á vinnustöðum.

Með varasömum efnum og vörutegundum er átt við eftirfarandi efni og vörutegundir:

- Efni sem flokkuð eru samkvæmt reglugerð nr. 236/1990, ásamt síðari breytingum, um eiturefni eða hættuleg efni og vörutegundir sem innihalda slík efni.
- Efni sem eru á skrá í reglum nr. 154/1999 um mengunarmörk og aðgerðir til að draga úr mengun á vinnustöðum.
- Eiturefni og hættuleg efni sem notuð eru í landbúnaði og til útrýmingar meindýra, samkvæmt reglugerð nr. 50/1984.
- Sprengiefni er falla undir gildandi reglugerð um sprengiefni.
- Efni og vörutegundir sem vegna efna- eða eðlisfræðilegra eiginleika geta að mati Vinnueftirlits ríkisins valdið heilsutjóni eða skapað slysaþættu við notkun á vinnustöðum.

Ákvæði þessara reglna gilda ekki um efni sem falla undir vopnalög nr. 16/1998 nema hvað varðar sprengiefni, sbr. d-lið 2. mgr. þessarar greinar, lyfjalög nr. 93/1994 og lög nr. 117/1985 um geislavarnir, nema hvað varðar aðra varasama eiginleika en geislavirkni.

2. gr.

Almenn ákvæði.

Sá sem afhendir varasöm efni eða vörutegundir sem falla undir reglur þessar, hvort sem það er framleiðandi, innflytjandi, seljandi eða dreifingaraðili, skal sjá viðtakanda fyrir öryggisleiðbeiningum með upplýsingum sem greinir í 3. gr.

Öryggisleiðbeiningar skulu vera á íslensku.

Öryggisleiðbeiningar skulu afhentar viðtakanda honum að kostnaðarlausu.

Við endurskoðun á öryggisleiðbeiningum skulu allir þeir sem fengið hafa viðkomandi efni eða vörutegund á síðustu 12 mánuðum fá nýjar öryggisleiðbeiningar sér að kostnaðarlausu óski þeir eftir því.

Ákvæði 1. mgr. þessarar greinar á ekki við ef um er að ræða sölu í verslunum sem almenningur á aðgang að, nema nota eigi efni eða vörutegund við atvinnurekstur og viðkomandi fari fram á að fá öryggisleiðbeiningar.

Öryggisleiðbeiningar skulu fylgja með efnum og vörutegundum þegar viðtakandi tekur á móti þeim í fyrsta skipti og þegar breytingar hafa verið gerðar á þeim vegna nýrra upplýsinga um öryggi er varðar heilsu starfsmanna og verndun umhverfis. Þegar öryggisleiðbeiningum hefur verið breytt skal koma fram á þeim að um endurskoðaða útgáfu sé að ræða.

Þeir sem nota efni eða vörutegundir við atvinnurekstur skulu sjá til þess að öryggisleiðbeiningar séu til staðar á notkunarstað. Þeir skulu óska eftir að fá öryggisleiðbeiningar við móttöku efna eða vörutegunda þegar þess er þörf.

Ekki er skylt að láta öryggisleiðbeiningar fylgja með efnum og vörutegundum við afhendingu til almenningsnota enda séu umbúðir merktar samkvæmt reglugerð nr. 236/1990 um flokkun, merkingu og meðferð eiturefna, hættulegra efna og vörutegunda, sem innihalda slík efni, með síðari breytingum. Öryggisleiðbeiningar skal ávallt afhenda ef farið er fram á það og nota á efni eða vörutegund við atvinnurekstur.

3. gr.

Upplýsingar í öryggisleiðbeiningum.

Öryggisleiðbeiningar sem um getur í 2. gr. skulu innihalda upplýsingar í samræmi við viðauka I um eftirfarandi efnispætti með þessum fyrirsögnum:

1. Söluheiti efnis eða vörutegundar. Nafn, heimilisfang og sími íslensks framleiðanda, innflytjanda eða seljanda.
2. Samsetning/upplýsingar um innihald.
3. Varúðarupplýsingar.
4. Skyndihjálp.
5. Bruni/aðferðir við að slökkva eld.
6. Efnaleki.
7. Meðhöndlun og geymsla.
8. Eftirlit með mengun/persónulegur hlífðarbúnaður.
9. Eðlis- og efnafræðilegir eiginleikar.
10. Stöðuleiki og hvarfgirni.
11. Eiturfræðilegar upplýsingar.
12. Hættur gagnvart umhverfinu.
13. Förgun.

14. Flutningur.

15. Upplýsingar um lög, reglugerðir eða reglur sem varða notkun efnisins eða vörutegundarinnar.

16. Aðrar upplýsingar.

Framleiðanda, innflytjanda eða seljanda er skylt að veita viðtakanda efna og vörutegunda upplýsingar um þá efnisþætti sem um getur í 1. mgr. þessarar greinar í formi öryggisleiðbeininga.

Öryggisleiðbeiningar skal dagsetja.

4. gr.

Gildistaka.

Reglur þessar eru settar af stjórn Vinnueftirlits ríkisins samkvæmt heimild í 38. og 51. gr. laga nr. 46/1980 um aðbúnað, hollustuhætti og öryggi á vinnustöðum. Ákvæði 12. liðar í viðauka I eru sett að höfðu samráði við umhverfisráðuneytið með stöð í lögum nr. 52/1988 um eiturefni og hættuleg efni, ásamt síðari breytingum, sbr. einnig lög nr. 7/1998 um hollustuhætti og mengunarvarnir. Einnig er höfð hliðsjón af ákvæðum 10. tl. XV. kafla. II. viðauka samningsins um Evrópska efnahagssvæðið, tilskipun nr. 91/155/EBE og eins og henni var breytt með tilskipun nr. 93/112/EBE. Reglur þessar eru hér með staðfestar til að öðlast gildi við birtingu. Um leið falla úr gildi reglur nr. 498/1996 um öryggisleiðbeiningar vegna efnanotkunar á vinnustöðum.

Félagsmálaráðuneytinu, 6. september 1999.

F. h. r.

Húnbogi Þorsteinsson.

Elín Blöndal.

VIÐAUKI I

Leiðbeiningar við gerð öryggisleiðbeininga.

Eftirfarandi útskýringar eru leiðbeinandi. Þær eiga að tryggja að upplýsingar undir sérhverri fyrirsögn 3. gr. reglnanna geri notendum varasamra efna eða vara sem innihalda slík efni kleift að gera nauðsynlegar ráðstafanir með tilliti til öryggis og hollustuhátta á vinnustöðum og verndun umhverfis.

Upplýsingar skulu vera á íslensku og á aðgengilegu og skýru máli.

Í ljósi þess að efni eða vörur geta haft margs konar eiginleika getur verið þörf á enn frekari upplýsingum en hér er fjallað um. Ef upplýsingar um vissa eiginleika eiga ekki við eða það er tæknilega ómögulegt að gefa ákveðnar upplýsingar skal geta ástæðnanna fyrir því.

Æskilegt er að röðun yfirskriftanna sem tilteknað eru í 3 gr. reglnanna sé fylgt.

Þegar breytingar hafa verið gerðar á öryggisleiðbeiningum skal athygli viðtakanda vakin á þeim.

1. *Söluheiti efnis eða vöru. Nafn, heimilisfang og sími íslensks framleiðanda, innflytjanda eða seljanda.*

1.1. Söluheiti efnis eða vöru skal vera það sama og notað er á umbúðum þeirra.

1.2. Gefa skal upp nafn og heimilisfang þess íslenska aðila sem ber ábyrgð á markaðssetningu efnis eða vöru, hvort sem það er framleiðandi, innflytjandi eða seljandi. Heimilisfangið verður að vera fullnægjandi ásamt símanúmeri viðkomandi.

1.3. Við fyrrgreindar upplýsingar skal bæta símanúmeri sem nota má í neyðartilvikum.

2. *Samsetning/upplýsingar um innihald.*

Upplýsingarnar eiga að gefa móttakandanum möguleika á að geta á skjótan hátt fundið út hvaða hættur fylgja notkun efnis eða vöru.

Gefa skal upp öll eiturefni og hættuleg efni ef þau eru í svo miklum styrk að taka skuli tillit til þeirra við hættuflokkun vörunnar samkvæmt reglugerð nr. 236/1990, um flokkun, merkingu og meðferð eiturefna, hættulegra efna og vörutegunda sem innihalda slík efni, með síðari breytingum.

Gefa skal upp öll efni af skrá í viðauka I í reglum nr. 154/1999 um mengunarmörk og aðgerðir til að draga úr mengun á vinnustöðum, ef styrkur þeirra er yfir 0,1%.

Geta skal þessar hættuflokkunar þ.e. hættuflokks, hættusetningar og varnaðarsetningar sem varan hefur fengið samkvæmt reglugerð nr. 236/1990 með síðari breytingum.

3. *Varúðarupplýsingar.*

Gera skal grein fyrir í stuttu en skýru máli helstu hættum við efni eða vöru og sömu-leiðis helstu hættum fyrir menn og umhverfið.

Lýsa skal helstu skaðlegu áhrifum og einkennum sem efni eða vara getur haft á heilsu fólks við notkun og einnig við hugsanlega misnotkun.

Upplýsingarnar skulu vera í samræmi við upplýsingar á umbúðum en þurfa ekki að vera endurtekning á þeim.

4. *Skyndihjálp.*

Brýnt er að geta þess hvort þörf er á lækniaðstoð þegar í stað ef óhapp verður.

Upplýsingar um skyndihjálp skulu vera stuttar og auðskiljanlegar fyrir þann sem hefur skaðast og þá sem veita skyndihjálp. Geta skal stuttlega um einkenni og áhrif. Í upplýsingunum skal koma fram hvað gera skuli á staðnum ef óhapp verður og einnig ef búast má við síðkomnum áhrifum.

Skipta skal upplýsingunum í undirflokka eftir því hvernig efni eða vara kemst í snertingu við fólk, þ.e. innöndun, snertingu við húð og augu og inntöku. Geta skal þess hvenær þörf er á eða ráðlegt að leita til læknis.

Stundum er nauðsynlegt að til staðar sé á vinnustöðum sérstakur búnaður eða efni, s.s. lyf, vegna sérstakrar skjótrar meðferðar við óhapp. Ef notkun efnis krefst þess ber að geta þess sérstaklega.

5. *Bruni/aðgerðir við að slökkva eld.*

Geta þarf þess hvaða viðbrögð eru æskileg/nauðsynleg ef kviknar í efni eða vöru eða ef eldur er laus í nágrenni.

Gefa skal upp:

- viðeigandi slökkviefni,
- slökkviefni sem af öryggisástæðum ekki má nota,
- hættur sem stafa frá efnum sem myndast við brunann,
- sérstakan persónulegan hlífðarbúnað sem nota skal við slökkvistörf.

6. *Efnaleki.*

Nauðsynlegt getur verið að gefa upplýsingar um eftirfarandi atriði, allt eftir því um hvaða efni eða vöru er að ræða:

- Öryggisráðstafanir til verndar fólki:
fjarlægja íkveikjuvalda, nægileg loftræsting/öndunargrímur, eftirlit með ryki, ráðstafanir til að fyrirbyggja snertingu við húð og augu o.fl.
- Öryggisráðstafanir til verndar umhverfi:
að hindra að efni eða vara berist í niðurfall, yfirborðs- eða grunnvatn eða jörðu, hugsanlega er þörf á að aðvara nágranna o.fl.

- Aðferðir við hreinsun:
notkun á ísogsefnum (t.d. sandi, kísilgúr, sýrubindiefni, alhliða bindiefni, sagi o.s.frv.), takmörkun á gas-/reykmyndun með hjálp vatns, þynning o.fl.
Gæta skal að þörf á notkun reglna eins og t.d.: Notið aldrei; Hlutleysist með

Vísa ber í 8. og 13. tl. þegar það á við.

7. *Meðhöndlun og geymsla.*

7.1. *Meðhöndlun.*

Gefa skal upp öruggar meðhöndlunarreglur þar með taldar tillögur að tæknibúnaði svo sem almenna og sérstaka loftræstingu, aðgerðir til að hindra úða- og rykmyndun og til að koma í veg fyrir bruna og sérstakar kröfur eða reglur um efni eða vöru (t.d. um búnað sem er bannaður eða ráðlagður).

7.2. *Geymsla.*

Gefa skal upp hvað teljast öruggar geymsluaðstæður, t.d. ef þörf er á sérstakri hönnun húsnæðis (t.d. með tilliti til loftræstingar), hvaða efni eða vörur meggi ekki geyma með hlutaðeigandi efni eða vöru, geymsluaðstæður (hita- og rakastig o.s.frv.), sérstakan rafbúnað og ef koma þarf í veg fyrir stöðurafmagn.

Þegar það á við skal gefa upp hámarks magn sem má hafa í geymslu.

Veita skal upplýsingar um kröfur, ef nokkrar, um það efni sem nota má í umbúðir um hlutaðeigandi/viðkomandi efni eða vöru.

8. *Eftirlit með mengun/persónuhlífur.*

Með eftirliti með mengun er átt við m.a. allar fyrirbyggjandi ráðstafanir sem grípa skal til við notkun efnis eða vöru til að draga úr þeirri mengun sem starfsmenn geta orðið fyrir.

Grípa skal til tæknilegra aðgerða áður en þörf verður á persónuhlífum. Gefa skal upp hentugan búnað, t.d. lokað kerfi og aðstæður, til viðbótar því sem fjallað er um undir lið 7.1.

Gefa skal upp mengunarmörk, þar með talin líffræðileg mengunarmörk, með tilvísunum. Veita skal upplýsingar um heppilegar aðferðir til að mæla eða meta hvort mengun sé undir eða yfir mörkum.

Ofantaldar leiðbeiningar og mörk skulu vera í samræmi við reglur nr. 154/1999 um mengunarmörk og aðgerðir til að draga úr mengun á vinnustöðum.

Ef þörf er á persónuhlífum skal veita upplýsingar um hvers konar búnaður er nauðsynlegur eða æskilegur.

• Öndunargrímur.

Ef um er að ræða varasamar lofttegundir, úða eða ryk skal íhuga hvers konar búnaður er heppilegur, t.d. ferskloftsgríma eða gríma með viðeigandi síu.

• Til hlífðar höndum.

Gefa skal upp hvers konar hanskaefni skal nota við meðhöndlun á efni eða vöru. Ef nauðsyn krefur skal gefa upplýsingar um annan búnað eða ráð til að verja húð og hendur.

• Til hlífðar augum.

Gefa skal upp hvers konar hlífðarbúnaður er nauðsynlegur eða heppilegur, t.d. hlífðargleraugu eða andlitshlíf.

• Til hlífðar húð.

Ef þörf er á að hlífa öðrum líkamshlutum en höndum skal veita upplýsingar um gerð persónuhlífa, t.d. hlífðarsvuntu, stígvél o.s.frv. Ef nauðsyn krefur skal gefa upp sérstakar hreinlætisráðstafanir og nauðsynlega hreinlætisaðstöðu.

Vísa skal til viðkomandi CEN staðla eftir því sem við á.

9. *Eðlis- og efnafræðilegir eiginleikar.*

Þessi hluti skal fjalla um eftirfarandi þætti eftir því sem við á:

Útlit: Gefa skal upp á hvaða formi efni eða vara er (fast, fljótandi, loftkennt) og lit efnis eða vöru við afhendingu.

Lykt: Ef efni eða vara hefur lykt skal lýsa henni í stuttu máli.

Sýrustig (pH): Gefa skal upp pH-gildi efnis eða vörunnar eins og það er þegar efnið eða varan er sett á markað eða á vatnslausn efnis eða vöru. Í síðara tilvikinu skal gefa upp styrkinn.

Suðumark/suðumarksbil

Bræðslumark/bræðslumarksbil

Blossamark/logamark

Íkveikjumark

Hætta á sjálfteyndrun

Sprengimörk

Eldnærandi eiginleikar

Gufuþrýstingur

Eðlisþyngd

Leysanleiki: - Vatnsleysanleiki

- Fituleysanleiki (gefa skal upp leysiefnið)

Deilistuðull: n-oktanól/vatn

Aðrar upplýsingar: Hér skal gefa upplýsingar sem skipta máli með tilliti til öryggis eins og t.d. eðlismassa gufu, blöndunar-eiginleika, uppgufunarhraða, leiðni, seigju o.s.frv.

Vísað er til prófunaraðferða hvað varðar framangreinda eiginleika, sbr. reglugerð nr. 236/1990 með síðari breytingum.

10. *Stöðugleiki og hvarfgirni.*

Hér skal veita upplýsingar um stöðugleika efnis eða vöru og möguleika á hættulegum efnahvörfum undir vissum kringumstæðum.

Aðstæður sem skal forðast:

Gefa skal upp aðstæður, t.d. hitastig, þrýsting, lýsingu, stuð sem geta komið af stað hættulegu hvarfi og gefa jafnframt stutta lýsingu á því ef þess er nokkur kostur.

Efni sem skal varast:

Gefa skal upp efni, t.d. vatn, loft, sýrur, basa, oxandi efni eða önnur efni sem geta komið af stað hættulegu hvarfi og lýsa því ef þess er nokkur kostur.

Varasöm niðurbrotsefni:

Gefa skal upp þau varasömu efni sem myndast í hættulega miklu magni við niðurbrot.

Einkum skal tiltaka:

- nauðsyn á sérstöku efni til að auka stöðugleikann og hvort þau eru fyrir hendi,
- möguleikann á hættulegu útvörmu hvarfi,
- öryggissjónarmið sem taka verður mið af vegna breytinga á eðlisfræðilegu formi efnis eða vöru,
- varasöm niðurbrotsefni sem geta myndast við snertingu við vatn,
- möguleikann á niðurbroti í óstöðug efni.

11. *Eiturfræðilegar upplýsingar.*

Þessi hluti fjallar um þörfina á stuttri en fullnægjandi og auðskiljanlegri lýsingu á hinum mismunandi eituráhrifum (heilsufarsáhrifum) sem notandi getur orðið fyrir komist efni eða vara í snertingu við hann.

Veita skal upplýsingar um hættuleg áhrif á heilsuna af völdum efnis eða vöru sem byggðar eru á bæði reynslu og ályktunum út frá vísindalegum rannsóknum. Lýsingin skal innihalda upplýsingar um með hvaða hætti efni eða vara getur haft skaðleg áhrif (innöndun, inntaka, snerting við húð og augu), ásamt lýsingu á einkennum sem eru af eðlis-, efna- og eiturefnafræðilegum toga. Einnig skal veita upplýsingar um þekkt bráð og síðkomin áhrif og þá einnig langtímaáhrif vegna bæði skammvinnrar og langtíma mengunar, t.d. ofnæmi, krabbamein, stökkbreytingar, áhrif á æxlun, þar á meðal fóstur-skemmdir sem og svæfingar- og deyfiaáhrif.

Með tilliti til þeirra upplýsinga sem fram koma samkvæmt grein 2 um *samsetningu/upplýsingar um innihald* getur verið nauðsynlegt að veita upplýsingar um áhrif einstakra efna á heilsuna.

12. *Hættur gagnvart umhverfi.*

Veita skal upplýsingar um hugsanleg áhrif, virkni og afdrif efnis eða efnavöru og notkun sem hægt er að sjá fyrir með góðu móti. Útvega skal sambærilegar upplýsingar um hættulegar afurðir sem verða til við niðurbrot efna og efnavara.

Dæmi um vistfræðilegar upplýsingar sem máli skipta eru taldar upp hér á eftir:

hreyfanleiki:	- þekkt eða fyrirsjáanleg dreifing efnis til umhverfis- þátta
	- yfirborðsspenna
	- ísog/afsog
	- aðrir eðlisefnafræðilegir eiginleikar, sjá 9. lið
niðurbrotshæfni:	- lífrænt og ólífrænt niðurbrot
	- niðurbrot með og án súrefnis
	- þrávirkni
hugsanleg uppsöfnun:	- hugsanleg uppsöfnun í lífverum
	- lífmögnun
<i>skamm- og langtíma áhrif varðandi:</i>	
umhverfiseituráhrif:	- vatnalífverur
	- jarðvegslífverur
	- landplöntur og -dýr
önnur skaðleg áhrif:	- hugsanleg ósoneyðing
	- hugsanleg ljósefnafræðileg ósonmyndun
	- hugsanleg hækkun hitastigs á jörðinni
	- áhrif á skólphreinsunarstöðvar

Athugasemdir.

Tryggja skal að upplýsingar sem máli skipta fyrir umhverfið séu einnig tilgreindar í öðrum liðum öryggisleiðbeininganna, einkum ráð varðandi losun undir eftirliti, ráðstafanir vegna losunar af slysi og hvað varðar förgun í 6., 7., 13., og 15. lið.

Með fyrirvara um viðmið vegna mats á umhverfisáhrifum efnavöru skal veita framan- greindar upplýsingar um efni sem eru í efnavöru og hægt er að flokka sem hættuleg umhverfinu.

13. *Förgun.*

Ef förgun á efni eða vöru (umframmagn eða úrgangur vegna fyrirsjáanlegrar notkunar) skapar hættu skal gefa lýsingu á afgangsefnum og upplýsingar um örugga meðferð.

Gefa skal upp viðeigandi aðferðir við förgun bæði á efni eða vöru og menguðum ílátum (brennsla, endurvinnsla, urðun o.s.frv.).

Athugasemd: Vísa skal til gildandi reglugerða um förgun úrgangs.

14. *Flutningur.*

Benda skal á reglur sem notandi eða sá sem annast flutning verður að þekkja til hvort sem um er að ræða tilfærslu á vinnustað eða utan hans.

Hægt er að veita viðbótarupplýsingar úr leiðbeiningum Sameinuðu þjóðanna og öðrum alþjóðasamþykktum um flutning og umbúðir um varasöm efni og vörur.

15. *Upplýsingar um lög, reglugerðir eða reglur sem varða notkun efnis eða vöru.*

Endurtaka skal þær upplýsingar sem eru á umbúðum vegna ákvæða í reglugerð nr. 236/1990 með síðari breytingum um flokkun, merkingu og meðferð eiturefna, hættulegra efna og vörutegunda sem innihalda slík efni.

Ef sérstök ákvæði (t.d. takmarkanir á notkun) gilda um efni eða vöru skal geta þess undir þessum lið.

16. *Aðrar upplýsingar.*

Veita skal aðrar upplýsingar sem skipt geta máli fyrir öryggi og heilsu og verndun umhverfis, eins og t.d.:

- ráðleggingar um menntun/þjálfun,
- ráð um notkun eða takmarkanir á notkun,
- ítarlegri upplýsingar (skriflegur heimildarlisti og/eða tæknilegur upplýsingaraðili),
- heimildir og annað hliðsjónarefni við gerð öryggisleiðbeininga.

Hér skal dagsetning öryggisleiðbeininga einnig koma fram sé hennar ekki getið annars staðar í þeim.

3. september 1999

Nr. 603

AUGLÝSING

um útgáfu skrár um viðurkenndar prófgráður og inntak þeirra.

Í samræmi við ákvæði 3. mgr. 9. gr. laga nr. 136/1997 um háskóla hefur menntamálaráðherra gefið út skrá um viðurkenndar prófgráður á háskólastigi og inntak þeirra, sem birtist sem fylgiskjal með auglýsingu þessari.

Auglýsing þessi öðlast þegar gildi.

Menntamálaráðuneytinu, 3. september 1999.

Björn Bjarnason.

Guðríður Sigurðardóttir.

Fylgiskjal.

Skrá um viðurkenndar prófgráður á háskólastigi og inntak þeirra.

HÁSKÓLI ÍSLANDS

Nám til fyrstu háskólagráðu:

cand.theol. próf í guðfræði til embættisprófs. 5 ár til 150 eininga.

B.A. próf í guðfræði. 3 ár til 90 eininga.

B.A. próf í djáknanámi. 3 ár til 90 eininga.

cand.med. et chir. próf í læknisfræði. 6 ára nám.

B.S. próf í læknisfræði. 1 ár á milli 3 og 4 árs í læknisfræði.

cand.pharm. í lyfjafræði lyfsala. 5 ár til 150 eininga.

B.S. próf í hjúkrunarfræði. 4 ár til 120 eininga.

B.S. próf í sjúkraþjálfun. 4 ár til 120 eininga.

cand.juris. próf í lögfræði. 5 ár til 150 eininga.